

9. Jemu přećiwejéje so sylni we wěrje, wědźicy, zo to same ćerpjenje tež so dóndže wašemu bratstwu, kotrež je w swěće.*


10. Bóh wšeje miłosće pak, kiž nas powola k swojej wěčne krasnosći w Khrystusu Jězusu, was, hdyž malo počerpišće, zdokonja, posylni a wobkrući.*

11. Jemu krasnosć a knježstwo wěki na wěki. Amen.

12. Přez Silvana,* swěrneho bratra, jakož za to mam, napisach wam zkrótka, napominajo a wobswědčuju, zo je to prawa miłosć Boža, w kotrejž stojće.**

13. Postrowja was cyrkej, kotraž je sobuwuzwolena w Babylonje,* a Markus mój syn.**

14. Postrowjeje so mjez sobu ze swjatym wokošenjom.* Miłosć wam wšitkim, kotřiž sće w Khrystusu Jězusu.** Amen.



DRUHI LIST S. JAPOŠTOŁA PĚTRA.

STAW I.

Napomina, zo bychy spominajcy na přewulke dary, kotrež wot Boha dóstachu, we wšelakich počiwosćach pokročowali, zo by so jim tak zastup do njebieskeho kralestwa dowolił; a praji, zo w krótkim wumrje, a dopokazuje, zo ma jeho wučba swoju wěstosć we wučerju, kiž je Khrystus, kotrehož hlós Wótca a profetojo poručachu.

Syman Pětr, služownik a japoštoł Jězusa Khrystusa, tym, kotřiž su z nami

jenajku wěru dóstali w sprawnosći našeho Boha a Zbóžnika Jězusa Khrystusa.*

2. Miłosć a pokoj napjelnjej was w spóznaću Boha a Khrystusa Jězusa našeho Knjeza.*

3. Jakož buchu nam wšitke kubla jeho bóžskeje mocy, kotrež su k žiwjenju a pobožnosći, darjene přez spóznaće toho, kiž nas ze samotnej krasnosću a mocu powola,*

9. Djabola móžeće jeno z mocu wěry so dowobarać, hdyž so spušeće na pomoc Božu, dokelž tutej krutej wěrje je dobyće slubjene a wěste, a wam budže wojowanje polóžene, hdyž so dopomniće, zo maja bratra po cyłym swěće podobne ćerpjenja, a zo, z brónju wěry mužnje wojujcy, w nich dobywaju. — 10. Bóh, wot kotrehož wša miłosć wukhadza a kotryž tež was k wěčne zbóžnosći přez Khrystusa powola, wobradzi wam hnadu wutrajnosće a posylni was po krótkim ćerpjenju a wobkrući was w swjatosći. — 12. Silvan je tón samy, kiž so druhdze (Jap. sk. 15, 22) Silas mjenuje, a kotryž bu wot zhromadizny japoštołow z listom jako Pawołowy přewodnik do Antiochije posłany, a kotryž Pawola potom na puću do Asije a Galacije přewodžeše; a tuž bě wosadam, kotrymž s. Pětr tónle list pisaše, znaty, a tohodla pósła jón tež přez Silvana. ** t. r. zo je wěra, kotruž přez japoštołske předowanje dóstašće a přijěšće, prawa wěra, a zo je Boža miłosć, kotruž přez wěru dóstašće, prawa miłosć, w kotrejž so woprawdže Bohu spodobaće a sebi wěčnu zbóžnosć dobudžeće. — 13. t. r. kotraž je tež runja wam ze swěta za wěčnu zbóžnosć wuzwolena. Babylon je město Rom, kotrež so tohodla tak mjenuje, dokelž běchu jeho wobydlerjo hroznym hrěcham poddaći, jakož wobydlerjo stareho Babylona, z kotrymiž sebi Bože khostanje zaslužihu. ** Marka mjenuje tu Pětr swojeho syna, w duchownym zmyslu, dokelž bě jeho w křesćanstwje rozwučował a křčił. — 14. t. r. z wokošenjom křesćanskeje lubosće. ** t. r. kotřiž sće zjednoćeni z Khrystusom přez wěru do njeho.

I. 1. Japoštoł wobroća so ke křesćanam, kotřiž běchu z pohanstwa k wěrje přistupili, a wobkruća jim, zo je wěra, kotruž jich japoštołowje wučachu, prawa, kotraž wosprawnja pola Boha ze zaslužbami Zbóžnika Jězusa Khrystusa. — 2. Čim dospoňišo Boha a Jězusa spóznowamy, čim nadobnišo přiběra w nas miłosć a pokoj Boži. — 3. Wam njech so dóstawa přez jeho spóznaće miłosć a pokoj, jakož bu nam přez jeho spóznaće wšo sobudžělene, štož jeho bóžska móc k dobyću wěčneho žiwjenja a pobožnosće přiwobroća. Khrystus powola nas k wěčne zbóžnosći ze swojej slawu a krasnosću, ke kotrejž bu pozběhnjeny.